

潛江縣志卷之十七

知縣事劉煥纂修

邑人朱軌震編著

門人莫扈儲校正

人物志

忠節

孝友

隱逸

義行

忠節傳

人亦有言三代以下之士所不足者非才也所有餘者非誠也誠有餘則愚愚則忠孝之性油然而生故能臨大節明大義矢志靡他縱剖心玉門不以爲苦又何異夫汗簡之虛聲孫子之優卹耶雖然死制死

潛江縣志

卷十七

人物志
忠節傳

衆若日月麗天之未可隱也百里之囚數百年之間有若而人載諸史冊亦足煥煥千古矧獨一邑之光乎作忠節傳

元

明安達爾

明安達爾字士元元統元年進士以宿州判官轉爲潛江達魯花赤至正十二年沔陽之賊逼城明安達爾率勇敢出擊擒其僞將劉萬戶進營蘆泆賊衆奄至出鬪歿其家殲焉一子桂山海牙懷印綬去時知荆門

州事聶炳字韞夫江夏人明安達爾同年進士城陷罵賊歿

明

余隆余威

余隆吳元年任大梁指揮僉事從明高皇帝屢戰有功擢福建都指揮僉事洪武八年歿於海賜祭葬威隆弟隆無子威襲長淮指揮僉事洪武十四年征雲南陣亡賜祭葬

歐陽燧

潛江縣志

卷十七

人物志
忠節傳

二

歐陽燧字見日號响樓舉人東昇子少負異才博通經史以歲貢士授黃州訓導遷盱眙知縣廉明有為神奸江胥啖以暮金燧却之密以聞之直指置胥於法遠近歡呼八角山羣盜負嵎屢拒官兵燧計獲巨魁諭以法令且給與俸錢令買耕具歸農樂業羣盜感泣立為解散以病乞歸盱眙之人鑄像立祠以祀之癸未正月闖賊破荊邦分兵擊潛衆潰走賊追至沱川埠燧被執賊知為紳欲降之燧曰孤城難守故隨衆至此豈能復俛首爾賊求生耶呼其妻廖氏曰母他往廖拾磚擊賊首

赴水成燧亦遇害

朱士完

朱士完字符 尚夙有文譽試輒為諸生冠崇禎丙子舉人揭榜之顯 士完夢有皂旗自西北飛來立於墓門上白書亂世忠臣四字時方清晏秘不敢傳至癸未闖賊破郢長驅至 潛士完為寇所獲知為孝廉欲官之完不屈械送襄陽 關營路經泗港守者稍疎完啣指履血題其壁曰栢臺 木舉人成處遂投縲栢臺朱氏家族所居地名也是時流寇往來焚殺村里為墟惟此茅屋巋然 潛江縣志 卷十七 人物志 忠節 三 獨存閱數月其妻猶得拾骸骨葬之忠貞之士鬼神亦不忍終湮劫之前夢異哉

楊自勝

楊自勝字孟昇以儒生工騎射崇禎癸未春闈賊據郢 六月十日賊將陳良保同僞令趙國珍率兵守潛所過 屠掠自勝率所練鄉勇迎戰於京山之喬莊口凡三晝 夜燄入無援猶手刃數十賊被執奮罵賊裂其口殘其 體以成時子 與甫生一月後補荆門州弟子員妻張徐 俱苦節終身

游鵠

游鵠邑南鄉民崇禎未闖獻克斥將軍左良玉奉命討賊不勝反縱兵殺掠甲申左兵至潛郊鵠與其子文琪被執鵠抗言曰將軍簪纓世胄朝廷倚為長城不戮力勤王殄滅逆賊乃長寇流毒殘及赤子將軍何面目見先帝乎良玉怒縛鵠文琪并其幼子若孫殺之嗚呼鵠父子慷慨赴死距今五十餘年幾無能道其軼事亂離之際明大節以致命遂志曷可易觀匹夫慕義如鵠者烏忍聽其湮沒而不傳乎

潛江縣志

卷十七

人物志

四

國朝

涂起鵬

涂起鵬字當世歲貢士授廣西平樂知縣撫字殘黎遠邇咸歸新定之邑漸致殷庶以上考列薦剡順治十年賊犯平樂孤城堅守援師不至遂陷鵬被執不屈與副使周永緒知府尹明廷同日遇害事聞

勅贈鵬廣西按察使司僉事陰一子入監讀書予祭一壇給與造葬銀一百一十兩遣官諭祭子最難陰生例得為令痛父歿事遂無意於仕幽貞處困以歿亦可謂

賢矣

論曰忠者臣下之高行然其道不一大忠以道覆君而化之次忠以德調君而輔之下忠以是諫非而怨之周公管仲子胥其人也若夫遭世不辜肝腦膏液之弗恤非灼見於危微幾希之介未有不逡巡瞻顧而謬引明哲之句以自解免者也儒者侈談節烈或推見至隱而不病其苛或畧舉行事而尚嫌其忽亦未可與尚論也已

孝友傳

潛江縣志

卷十七

人物志
孝友傳

五

孝者百行之首也漢元朔元年詔曰不察廉不勝任當免不舉孝不奉詔當以不敬論故污巷之人仗節循孝則朝廷敬謝而升諸朝服官蒞民有求忠於孝之義焉後取士一於制科而孝弟之行曾不得見褒於州郡豈非名實之異升降之辨哉爰自士大夫以及傭隸齟齬以至壯年孝行表著者核實備錄以勵俗而立教作孝友傳

明

初言

初言字幼嘉嘉靖戊午舉人父芳性最嚴言左右盡養無不得其歡心父卒京邸訃聞言徒跣就道扶櫬歸廬墓三載繼母王氏疾躬侍湯藥寢食俱廢與異母弟同居絕無私營經淮上見水濱女屍詢之居人謂母利客金強女不從而歿言曰有是哉其天地之正氣乎易棺埋葬而去未仕卒門人私謚爲文孝先生

柴浩

柴浩中港鄉人年十五父仕英病篤浩籲天割左股肉和粥以進父病卽愈

弘治舊志

潛江縣志

卷十七

人物志
孝友傳

六

廖安定

廖安定太平鄉人母李氏年老臥病安定沐浴焚香割左股母食之病瘥

弘治舊志

謝復清

謝復清道隆鄉人邑廩庠生成化九年父榮病篤清遍求醫藥弗效乃於夜浹密叩天祝曰清乃父之遺體願毀身以救父祝畢割股和羹以進父疾卽愈

萬曆舊志

何瓚

何瓚長樂鄉人事親能養志病革呼瓚至不言瓚泣問

曰父不言者得非為庶母及幼弟琰乎父領之父歿瓚事庶母益恭謹不衰與弟琰同居終身

萬曆舊志

張鈞

張鈞方廂鄉人年十二割股救父明邑侯曹公珩旌表之其子文蔚亦以十二歲割股救母順治十二年里中以父子繼孝之詞聞於上兵巡吳公之紀表其閭曰孝鍾一門

何翰

何翰字扶搖御史薦可季子風度曠夷自強問學事親

潛江縣志

卷十七

人物志
孝友傳

七

以孝稱萬曆乙卯秋闈甫畢即臥病武昌寓中榜發翰領鄉薦二十九名是時薦可尚任常州司理適有人自常州來浪傳常署有凶問翰知母陳夙疾未瘳疑母不祿大痛病劇旋卒是夕魂游常署母忽呼翰至歎語移時聞者以為譖或以為囂謂想之所結若或見之母曰兒實在側奉我湯藥爾輩何詫耶逾十數日皆母子相依狀後訃至時日頗符一時驚傳怪事翰妻方氏聞翰卒亦哀毀數日而歿學使周公燝具題奉旨旌表孝

烈

龔本源

龔本源母楊氏年八十病劇思食鴨醫云脾疾不可食源號泣叩天割左臂和麩以進母食就寢覺云我頃夢高冠袍笏大人侍從森列謂爾子孝心延爾齡三載後母病不能起醫者曰龔苦者生甘者死源乃取糞嘗之甘悲痛幾絕母卒年八十三初源父死且葬源曰牲醴之祭豈足盡人子之心嚙指血作饌以奠廬墓三年妻向氏歿源甫三十餘終身不娶崇禎間里人以孝義聞邑侯南昌羅公萬象旌其門孫弘毅順治丁酉科舉人潛江縣志

卷十七

人物志 孝友傳

八

初授興國州學正擢婺源知縣

高如岐

高如岐字文卿文學高魁之子也讀書尚操履兄弟友愛為鄉曲所推岐為後於高科科產頗腴悉均之諸弟且取諸弟之瘠者自予安貧力學以所獲脩脯供甘旨學使瞿公有孝不遺親產能均弟之袞邑侯王公念祖呼先生而不名蓋重之也孫明順治戊子拔貢仕中牟知縣

丘 姓

丘姓字兩生邑庠生丘志夔之子少業儒崇禎戊寅母
朱氏病危姓默禱於天割股和肉食以進母食而甘病
獲起邑侯羅公萬象聞而旌之賜以金帛癸未闖賊之
亂母復病姓負母逃與賊遇姓以病母哀告賊爲色動
但截姓耳而釋之翌日母歿於背姓覓一棺盛之淺殯
於土顛天痛哭兩晝夜伏地呼母不絕忽有相應聲自
遠起漸至冢中聲益著姓異之啟視則母已復甦如睡
初覺然姓喜更負母走出入賊營俱得倖脫至甲申母
始終於正寢

潛江縣志

卷十七

人物志
孝友傳

九

郭 鑽

郭鑽邑庠生郭之輅第四子癸未二月闖賊破潛之輅
誠諸子領家屬宜分途遁倘有變勿俱陷虎口長子鋤
隨父之輅母趙氏往賊獲輅將刃之鋤以身蔽且求代
不得遂遇害同執者逃以聞於鑽鑽卽訣妻子往覓親
骨上下百里凡枕骸浮屍內無不抱認終不能獲絕粒
七日至屍盡處自沈水歿其兄鉀錘亦被執繫於營罵
賊而歿一家蒙難唯鑽爲從容就義尤難矣哉

國朝

朱士弘

朱士弘字恢若邑庠生桂林太守之玉長子性謙謹秉禮教門以內肅如也敬事繼母初恭人如所生友愛幼弟父年八十士弘齒亦逾艾承歡養志細大無間順治甲午夏父玉寢疾士弘躬侍牀茵彌月父病革士弘號泣嘔血一慟而絕里人上其事邑侯葉公臣遇轉聞憲司表其門曰孝思永錫

周淑元

周淑元字皆醇邑廩庠生父耆儒光祚言愨行惇擅博

潛江縣志

卷十七

人物志
孝友傳

十

物洽聞之譽里中以端人推之淑元恂謹有家學祖母楊年六十九患日而矇淑元兒時泣禱於神願減筭以復祖母明楊一夕感夢有告以汝孫童稚至孝還汝一目增壽五年之語寤而矇果開壽七十五終父光祚嘗遊秦中淑元侍母朱氏朱為隱士默石子之孫女性恭慈頗識文義課以誦習母病癰淑元日夕哀號鄰叟張憐而重其行以女妻之長學為文思密辭贍其伯父保寧守夢漁公最奇愛後以童子試見知於邑侯邵陽王公會學使宜興蔣公合試郡屬首拔食餼為名諸生益

乃行善事如其撫趙氏女甥哺以弟孤兒幼女無異已
出解橐金助貧旅歸葬皆爲人所難者康熙癸酉下第
歸母朱年七十四忽無疾欠伸而逝淑无慟哭傾倒嘔
血數升微言母苦苦遂卒古云死孝可勿媿已里人列
狀請旌

論曰嘗攷明洪武未定令人子身體髮膚受之父母
小人好奇邀賞乃有割股割心之事倘有不虞反傷
親心自後儿有親疾務慎醫藥或情不得已亦聽爲
之不在旌表之列大哉王言何一非臨深履薄之意

潛江縣志

卷十七

人物志
孝友傳

十一

特未可槩爲不學者道也彼顛蒙之子樸茂不散痛
親身之危篤計無所之而反以割股爲起死之方至
誠惻怛念其痛楚豈尚有市心於其間哉故於割股
諸人俱存其名以表愚孝若初孝廉之廬墓養志何
孝廉之游魂侍疾周文學之以身殉親皆足師表後
學而丘姓之呼母再生竟奪鬼神之權事尤特異因
知禮升屋而呼三日而殮當大事者未可具文視也
已

隱逸傳

凡物之珍天地寶之明珠產於深淵不割蛟龍不可
得而探也大璞蘊於崇山不搏虎豹不可得而致也
鄉嬛宛委之書不百舍重疊鬼神不發其秘也况鑿
坏杜門之士豈猶夫處囊中而輕見其末者乎舊志
高隱者流缺而不載果數百年來潛邑盡風雲之士
與抑鴻飛冥冥弋人徒矯首層霄也惜乎前之人不
可得而考矣後之君子其忍軼諸作隱逸傳

明

默石子

潛江縣志

卷十七

人物志
隱逸傳

三

默石子明永嘉侯朱亮祖八世孫名孔昭字晦之其先
自鍾陵徙潛少孤嗜學初應童子科獲後勁以言忤有
司遂棄制舉業湛思經史天官輿地及服食導引之書
罔不搜討論列而於孫吳尤精焉事母孝力田供甘旨
瀕河築室流水遶舍嘉樹千章庭植紫薇一本八榦榦
俱二十丈許中可置几環坐吟歎花時鬱若紫霞故名
紫霞莊既終養遨遊四方與顧吏部涇陽高總憲景逸
為道學友著聖學正脈二卷播函及大司馬魏養蒙出
師禮聘至幕府出奇制勝功上欽依叅謀昭笑曰吾讀

書識將畧行天下諳形勝貯胸中無益用助廓清耳豈
爲是區區者哉嘗三出山海關著太平畧十卷間語同
里黃鳳文曰吾嘗登山海關望東方有真人氣三十年
後當出吾去遠矣後鳳文以崇禎癸酉舉於鄉順治間
任青州郡倅其前知有如此者邑侯陳公夢琬甫下車
就諮利病昭條議數千言惜軼其稿性少諧雖學道豪
氣時時溢出如俗客不來無所憾主人對此長浩然獨
立一世外所思千古前皆其自道語晚悟危言之難自
箴曰吾今而後其默如石矣遂號默石子好著黃繪冠

潛江縣志

卷十七

人物志
隱逸傳

十三

方幅道斃每理田事雖有鉅卿造訪稼畢乃衣冠延入
出麥飯鹽藿諸公不敢不飽與邑太僕宜諸歐陽公友
善歐陽公卒昭爲文哭之曰嗚呼先生敏而好學矜而
不爭二百年來一人而已生平慎交嚴許可類然熹宗
甲子二子爲稱七十壽觴適高景逸訃自毘陵至卽辭
賓撤筵檢笥中素往還手書詩扇陳於堂拜奠哭五日
不休刻期買舟東下二子畱之不可得後四年二子孟
麟仲麟走吳越間徧求莫知所之歸經采石於逆旅壁
間得默石子別友詩有白雲五嶽之句崇禎末有人邂

返匡廬之麓數語辭別又方士相傳遇默石子於洞庭
山寺云

國朝

東岸居人

東岸居人王啟遠字公逸性孤介寡交遊視車馬榮華
蔑如也善屬文尤工詞賦列膠庠十餘年未謁官長其
父海雲布衣有孝行啟遠事親亦如之甲申寇兵掠潛
啟遠徒步負母避竟以成疾遂不求聞達卜築洛江之
濱號曰東岸居人宅三畝環以竹樹種橘千頭名花錯

潛江縣志

卷十七

人物志
隱逸傳

十四

列每清秋霜候橘實纍纍有載酒過者嘯傲其下摘以
佐觴啟遠飲不過三升而醉或吟或臥惟意所適嘗謂
人曰嚼殘玉汁黨家臙肯相易耶歲以賣花鬻文之直
贍其妻子有餽遺悉拒之一日晨起書於几曰浩氣歸
虛無悠然脫世情寸心對上帝清若一平生趺坐而逝
所著有治懷草橘園後半百詩棄草拾錄素榮軒雜著
袁贅菴奕譜

塞翁

塞翁系出安成劉氏翁高祖贈君巨秀徙居潛江生翁

曾祖孝廉勲官運同勲有子三仲曰垓進士歷仕提學
僉事以理學名是爲翁祖明經南金僉事之子司寇若
金之弟性狷介不伍於俗時人有於陵仲子之目實爲
翁所自出翁少卽厭棄統緒知世將變亂學制科不成
遂有稼圃終焉之意崇禎癸未甲申間司寇奉特召督
撫閩廣遣人迎翁携家同處海濱以恩蔭相屬翁怫然
曰習見臺閣故事雖有黃瓊李固自甘恬退守節豈少
季札子臧獨柰何受任子封乎因自號曰塞翁其堅德
固性困益甚而守益貞可謂難矣所居常屢遷喜與人

潛江縣志

卷十七

人物志
隱逸傳

五

飲興至輒吟詩吟成隨手棄去不以示人工寫生其所
作竹樹花鳥洒闌歌罷微酣落筆尺牘便面筆墨飛動
狂呼大叫淋漓滿志得者爭以爲寶或貽書致幣鄭重
請乞摩挲縮瑟經時不肯就一紙四方賢公卿造廬就
見者無虛日翁唯引分自謝以是逃名而名愈盛年七
十一卒翁名泌如字毅侯子效曾歲貢士初授咸寧教
諭補穀城教諭以卓異擢懷寧知縣介特有爲能不媿
其家學焉孫先歲貢士燦太學生

論曰潛德幽光詎以要譽篤費其尚焉出處生人之

大端依世則廢道違俗則危殆浮沈進退工持祿保
位之術者固勿論已用之無致主安民之學舍之鮮
潔身範俗之操習爲貌言詭行侈談高尚盜虛聲以
文其媵鄙挾一技一能翺游大人之門輒自詡曰隱
士亂德之徒尤君子所惡焉易曰遯世不見知而勿
悶樂則行之憂則違之確乎其不可拔如是其人者
而後可以隱逸稱之默石子東岸居人塞翁而外寧
易遘止乎

義行傳

潛江縣志

卷十七

人物志
義行傳

六

行已忠厚之風邈以義俠傳者代不數見其輕利奸
名敦古處以勸薄俗艷稱人口者昔人有銀管之述
焉作義行傳

明

李本洪

李本洪天性淳樸以躬穡治產遂稱素封弘治間檄監
繕學宮估約而費鉅洪斥緡助官無恡容構椿楸大木
爲東西二梁有嘲之者洪曰焉知吾子孫之不見庇於
先聖也正德初郡大饑部使畢公議賑洪捐助倍人劄

授七品散秩洪家殖而喜施賑艱給困活人甦孳邑中
無大小呼爲恩爹蓋感之也厥後子鑿貢士孫崇信舉
人曾孫鳴鄉魁元孫之舉會魁暨貺世兌皆以禮記魁
於鄉科名奕葉信厚德之徵云

朱希顏

朱希顏字少南天啟丙寅歲大饑希顏首倡捐賑邑侯
蓬萊陳公旌其門曰尚義濟民崇禎庚辰歲又饑邑侯
南昌羅公勸賑希顏捐倍於衆羅公題額有名行冠邑
之褒子登鳳好施予有父風孫國柱太學生

潛江縣志

卷十七

人物志
義行傳

七

郭 鈿

郭鈿字元銘慶遠太守之幹子以恩貢任宛州通判致
仕崇禎癸酉歲大祲饑殍遍野鈿首出粟賑貸相率者
衆邑有起色尤好恢廓祠廟修治橋約施堅櫓給人以
粒溫人以續貧者德之年六十卒

國朝

朱 紱

朱紱字方來邑庠生氣宇恢直好立名樂稱人善有大
興除雖忤有司禍身破產弗卹也河北楊林外九塊土

田窪下差徭繁重連苦巨浸人民死徙緘披陳災荒疾
苦請定折畝減租之案條陳載賦役志至今德之族中困於里
排有兄弟鬻身者緘捐銀八十兩贖還有子姪轉徙他
方流離失所者緘曲為招至以近村田廬安處之晚喜
與人譚孝友忠厚之言鄉閭多所感化年七十三卒子
學素歲貢教諭學洛歲貢訓導仕任太學生州同學閩
歲貢訓導孫有莘太學生

潛江縣志

卷十七

人物志
義行傳

太

潛江縣志卷之十七終